



DE CHRISTI DOMINI
ASCENSIONE
ORATIO

Habita in Sacello Pontificio
AB ANGELO FABRONIO
BASILICÆ S. MARIE TRANSTYBERIM
CANONICO.



R O M Æ
APUD JOANNEM MARIAM SALVIONI
TYPOGRAPHUM VATICANUM
M. DCC LV.

SUPERIORUM FACULTATE.



SS. DOMINO NOSTRO
BENEDICTO XIV.
PONT. MAX.

ANGELUS FABRONIUS.



*Uamquam nihil homini
potest accidere vel ho-
norificentius, vel præ-
clarius, quam id,
quod mihi impositum
fuit, ut apud Te, BEA-
TISSIME PATER, ver-*

*ba facerem, ea tamen res non parum mihi
curæ, atque molestiæ attulit. Nam me
plurimum commovebat, vehementerque de-
terrebat Majestas, ac Dignitas Tua, qua
ad Deum proxime accedis, ne in locum
omnium amplissimum descenderem, quo*

nil nisi perfectum ingenio, elaboratumque industria afferri oportere intelligebam. Recreavit me tamen singularis humanitas, ac clementia Tua, eique tantum tribui, ut omni abjecto metu de Christi Domini in Caelos Ascensu dicendi onus mihi libenter suscipiendum putaverim. Hanc igitur Orationem, BEATISSIME PATER, supplex & qua maxima decet veneratione Tibi offero, quam vellem tantiesse, ut observantiæ erga Te meæ monumentum ac testimonium maneret perpetuum. Ea enim est virtutis vis, splendor, ac dignitas, ut omnes in sui amorem, atque admirationem pertrahat; cujus quidem imaginem ita expressam habes, ut quam frustra expetierat Plato, in Te nobis liceat intueri. Sed non est hujus loci Tuarum amplissimarum laudum præconium facere. Interea D.O.M. oro, atque obtestor, ut Te ad Populi Romani votum, ad universi Christiani Orbis bonum, gloriam, atque ornamentum diu sospitem, atque incolumem servet.



ORATIO.



Nullum umquam tempus,
 BEATISSIME PATER,
 nobis concessum est, quo
 magnopere gaudendum
 esse videatur, id profecto
 accidit hodierno die, quo
 Christus Dominus infi-
 mis his terris relictis ad
 superos, æternumque Patrem evolavit. Quæ
 enim tanta potest esse dicendi vis, quod tam
 divinum, atque incredibile ingenium, quo
 quisquam bonorum magnitudinem, quæ ad
 nos inde provenerint, verbis exæquare, at-
 que oratione complecti valeat? Profecto im-
 mensum quiddam est, atque infinitum, quod
 Deo immortalī debemus, qui hodie *captivam*
 A 3 *ducens*

ducens captivitatem (a), æternæ vitæ aditum nobis patefecit, quique nos tanta caritate, prosequutus est, ut non modo calamitatem nostram detraxerit, sed etiam plurimum honestaverit. Quapropter præclare a me factum iri existimo, si hinc Orationis meæ argumentum sumam, quam vos attente, bonaque cum venia excepturos esse confido.

Ponite, quæso, ante oculos infelicissimam humanæ naturæ conditionem, ad quam primi hominis iniquitate pervenerat: obversentur animis exitiosi, pestilentesque illius culpæ effectus, quo facilius misericordiam, ac clementiam Dei singularem perspiciamus. Num qui status excogitari deterior poterat? num quid nisi caliginis, cæcitatæ, ac miseriarum plenum? In quantos errores, in quod stultitiæ, atque inscientiæ barathrum prolapsi mortales! Illorum pectora teterrimus, ac fallacissimus hostis usque adeo occupaverat, ut quum nullis jam terminis, ac cancellis impietas contineretur, deliberaverit Deus, quasi facti pertæsus, humanum genus funditus de terra tollere, ac penitus extirpare. *Delebo, inquit, hominem, quem creavi, a facie terræ (b)*. Quibus tot incommodis reme-

(a) *Ad Eph. 4. 8.*

(b) *Gen. 6. 7.*

remedium sane erat nullum, nisi unus inventus esset Jesus qui Patrem propitiaret (a), quique omnium perniciosissimo bello extincto æternam nobis pacem, ac tranquillitatem reportaret. Itaque Christus, ut nos redimeret de maledicto legis, factus est pro nobis maledictum (b), atque una nobiscum degens in similitudinem carnis peccati (c), non probra, non convicia, non mortem denique turpem, acerbissimamque recusavit, ut humanum genus æterno Patri reconciliaret, atque ab interitu vindicaret. Quid vultis amplius? Necesse tamen erat, ut tantum, actam præclarum Reparationis nostræ opus hodiernæ die perficeretur, qua Christus humanæ naturæ primitias Patri offerens, Regni cælestis fores referavit, ut nos summæ ejus felicitatis, æternæque beatitudinis participes haberet. Hoc enim unum omnis actæ in terris vitæ cursu spectavit, hæc fuit causa (d) quamobrem tam dira, atque immania perferre non dubitaverit. Videte nunc quam admirabilis, ac inaudita Servatoris nostri benignitas fuerit, cujus beneficio nos, qui terra videbamur indigni, hodie Cælos pervasimus; qui

(a) *Job.* 33. 24.

(b) *Ad Gal.* 3. 13.

(c) *Ad Rom.* 8. 3.

(d) *Chrysost. Homil. de Ascen.*

qui morte damnati fuimus, immortalitate donamur; & qui ab omni terreno principatu, atque honore excideramus, ad cæleste supernumque regnum triumphantes evehimur. Nonne satis erat ad amœnissimam, e qua pulsi fuerant primi parentes, Paradisi regionem potuisse reverti? Quanti illud fuisset, durissimæ servitutis vinculis abruptis, in liberas æternasque sedes supra omnem astorum altitudinem ascendere? Quis neget longe plurimum nobis tributum iri honoris, si intra beatissima Angelorum agmina humanæ naturæ versari contigisset? Verum (incredibile dictu!) quæ cunctis olim erat abjectior, cunctis est hodie facta sublimior. Ipsa enim universos prætergressa est Angelicos Ordines, nec prius substitit, quam æterni Patris gloriæ proxime conjuncta illius ad dextram collocaretur. Quid ergo gloriosius, quid honorificentius nobis accidere potuit? Satisne in Christum Jesum umquam grati videbimur, qui, ut calamitatem nostram levaret, ipsius calamitatis socius esse voluit, qui pro nostra salute nullum supplicium, nullum vitæ discrimen sibi vitandum putavit, qui nos ad tantum dignitatis fastigium evexit, quantum non dicam sperandum, sed ne optandum quidem videretur? Quæ memoria, quæ vis ingenii, quæ

quæ magnitudo observantiæ tot, tantisque beneficiis respondere poterit? Sed quoniam, ut S. Leonis verbis utar (a), Ascensio Christi nostra provectio est, & quo processit gloria Capitis, eo spes vocatur & corporis, quumque certissimum sit non habitandi locum, sed commorandi diversorium nobis in terris esse concessum; quanta nos idcirco erigi spe decet, fore aliquando, ut tot tantisque miseriis, quibus humana vita proposita est, morte perfuncti, in æternam gloriam, atque in tutum illum, tranquillumque felicitatis, ac quietis portum recipiamur? Desinant igitur, desinant homines de sua sorte conqueri; fors enim nostra Christus jam factus est. Agnoscamus, Auditores, agnoscamus insignem nobilitatem, quam hodie adepti sumus, atque Apostoli inhærendo præceptis (b) hæc cura infixæ sit animis nostris sempiterna, ut nihil de terrenis rebus solliciti, cælestia tantummodo perquiramus. Quod si quis existimat nobis auxilii aliquid, præsidiique eo detractum esse, quod Christus ab hominibus discesserit, is profecto vehementer errat. Etenim licet ipse non amplius in terris humana forma se conspiciendum præbeat, pollicitus tamen

(a) *Serm. 1. de Ascens.*

(b) *Coloss. 3. 1. & 2.*

tamen est, divino modo futurum nobiscum usque ad consummationem sæculi (a); quin etiam quotidie interpellans pro nobis (b), eo studio causam nostram apud Patrem tuetur, ut nihil illi tam acceptum, quam humanum genus, nihil tam carum, quam nostra salus esse videatur. Quid quod si ex ejusdem in Cælos Ascensu plurimum Ecclesiæ momenti, atque utilitatis accessit? Testem appello beatissimum illum Apostolorum cœtum, per quos ipsa Ecclesia munienda, atque firmanda erat, qui licet quotidiana Divini Verbi consuetudine uterentur, licet sanctissimis ejusdem imbuerentur præceptis, summa tamen erat ante hoc tempus in illis infirmitas, ut omnia paverent, omnia dolerent, ac vel levi concussi motu illico prosternerentur. At postquam Christus cælum ascendit, quam repente immutati, qua luce illustrati, qua caritate incensi, qua fide roborati! Etenim Divini Spiritus dona, illa, inquam, dona, quibus Dei formatur Ecclesia, unde ad illos nisi ex hodierna solemnitate profluxerunt? *Si enim non abiero, Paraclitus non veniet ad vos, si autem abiero, mittam eum ad vos* (c). Quid ita? Nonne poterat

(a) *Matth.* 28. 20.(c) *Jo.* 16. 7.(b) *Ad Rom.* 8. 34. *ad Heb.* 7. 25.

terat Christus large, effuseque id ipsum perficere, dum is adhuc in terris degeret? Credo equidem: sed par erat illum prius dignitatis suæ, quam nostræ utilitatis rationem habere, quia ut est apud Joannem (a): *Nondum erat Spiritus datus, quia Jesus nondum erat glorificatus*. Quæ quum ita se habeant, quis erit animo tam crudeli atque impio, qui singulari Christi Jesu erga nos amoris amore respondere, & quoniam inops referre gratiam non potest, habere saltem recuset? Quis adeo omnis sensus expers, qui quum tam faustus, tam felix nobis dies illuxerit, se totum gaudio lætitiaque compleri non sentiat? Age, igitur: *Omnes gentes plaudite manibus: jubilate Deo in voce exultationis. Ascendit Deus in jubilo, & Dominus in voce tubæ* (b).

(a) Jo. 7. 39.

(b) Ps. 46. 1. & 5.

1000. 730

1000. 730